

Main creativs ch'ils «pitschens»

Concurrenza per las scolas dal stgalim aut

DA GION NUTEGN STGIER / ANR

■ La concurrenza da Gastro Grischun e hotelleriesuisse Grischun è a fin.

L'emna passada ha ina giuria taxà las trais meglras lavurs da las classas primaras ed ier èn vegnidas preschentadas las trais meglras lavurs da las scolas dal stgalim aut. Persvas la giuria il pli fitg ha la lavur dals scolars da Tusaun. La situaziun da partenza è er stada tar ils scolars e las scolaras da las scolas secundaras e realas la medema sco tar ils mats e las mattas da las scolas primaras. In suentermezdi han ils 600 scolars e las scolaras da las classas dal stgalim aut passentà en in da quels 50 otels dal Grischun che èn sa participads a l'acziun per las scolas. Persunas dal rom han preschentà las diversas professiuns da la gastronomia cunzunt per quels mats e quellas mattas che han eventualmain interess da far in emprendissadi en in otel ubain en in restaurant. Quai è er l'intent principal da l'acziun da Gastro Grischun e hotelleriesuisse dals ultims nov mais cun las scolas grischunas. La finamira da quella campagna è da gudagnar persunas giuvnas per la gastronomia e da mussar che er en quella bran-

scha è pussaivel da far ina carriera professiunala. Quai avain nus gia cuntanschi, ha ditg *Jürg Domenig*, il gestiunari da hotelleriesuisse Grischun. Singuls mats ed intginas mattas han gia fatg in contract per l'emprendissadi en in otel.

Blers films e «dvd's»

In suentermezdi han er ils scolars e las scolaras dal stgalim aut guardà als cuschiniers, als cameriers ed a las mattas da chombras sur las spadlas. En cumparaziun cun ils uffants da las scolas primaras èn quels mats e quellas mattas da las scolas secundaras e realas betg stads uschè fascinads da la visita en ils otels. Quai han cunzunt er confermà las lavurs inoltradas per la concurrenza che èn vegnidas preschentadas ier a la publicitad. Ils scolars e las scolaras dal stgalim aut èn stads main creativs cun zambregiar, modellar, malegiar, filmar e scriver. Ina buna part da las lavurs che las 32 classas dal stgalim aut han inoltrà èn films che èn vegnids fatgs en l'otel e suenter mess quels sin in «dvd».

Segund rang per ina classa da Laax

Confermà quai han er las trais

persunas da la giuria, *Arnold Cramer*, galerist, *Felix Dietrich*, hotelier e *Rudolf Mirer*, pictur artist. En quella vegliadetgna da la scola secundara e reala hajan ils mats e las mattas auters interess che da zambregiar per ina concurrenza, han ditg ils trais commembers da la giuria. Tuttina han els giuditgà las trais meglras lavurs che vegnan a la fin finala premiadas cun ina summa da 6000 francs. Persvas il pli fitg la giuria han ils scolars e las scolaras da l'1. reala da Tusaun. Ils mats e las mattas èn stads en l'otel Fravi ad Andeer e suenter fatg in prospect da l'otel en ina dimensiun pli gronda. Felix Dietrich, in dals commembers da la giuria, è stà fascinà da quella lavur. La lavur conferma che la classa haja guarda bain tut quai che marscha en in otel e cunzunt saja reussì d'integrar il vesì en la lavur. 2000 francs han retschet l'1. e la 2. classa secundara da Laax per lur lavur. Ils scolars e las scolaras han bunamain creà in menu e preschentà quel a la giuria e quai en moda fitg originala. La buna idea ha la giuria premià cun il segund rang. Il terz premi ha guadagnà l'1. classa reala da Vaz/Lai cun ina miniatura da l'otel Schweizerhof a Lai.



Claudia Züllig, hoteliera e Felix Dietrich, hotelier èn stads inchantads da las lavurs.

FOTOS G.N. STGIER



Terz rang per ils mats e las mattas da Vaz/Lai.



Quels da Tusaun che han guadagnà la concurrenza tar il stgalim aut.



En ina moda originala han ils scolars e las scolaras da Laax preschentà lur menu.